



*Rabu, 14 Desember 2022*  
**Ogen: Masmur 90:12**



**Ngertiken Gendekna Geluh Enda**



**E**rbage-bage cara kalak ibas ndalani kegeluhenna. Lit si erdalan ngikut-ngikuti kai nina kalak, bagi Siti Nurbaya. Lita ka sierdalan erpalasken ngikuti situasi, situasional nina kin, la tentu pendirianna. Lit ka si ndalani geluh ngikuti sura-surana jine, lalit ise pe banci mereken masukan man bana, menurut ia, ia si pasna, ngasamken kepentarena amin gia ersibar nge kerina. Si merarik jaman enda, terlebih ibas kalangen Kristen, sebab ulanai nungkun man guru-guru si baso, nungkun kata ras pengenehenen man tim-tim doa, janah pengenehenen e iasamken ibas kai-kai pe. La kin la e pe nggo pemberhalaan karunia, ateta ka. Secara umum, adi bage kin caranta ndalani kegeluhen latih ras tondel ka kedungenna. Sebab pemeteha ersibar nge, ngikuti sura-sura doni enda ras perkatan kalak la erbias-bias desken nginem lau lawit. Uga dage carana gelah ndalani geluh enda, menahang, senang.

Dalanilah wari-wari enda alu ngatakan bujur man Tuhan. Sebab Ia nggo ngaturken tep-tep wari alu sikap kal man gunata. Pusuh si ngatakan bujur eme pusuh si pentar, sebab beluh kita mbeligai pasu-pasu Tuhan man banta. Pusuh si pentar jadi ibas proses demi proses ija kita melibatkan Tuhan ras ngikuti sura-surana bas geluhta. Pusuh si pentar eme ulih pusuh si tek maka kata dibata e tuhu-tuhu dengen payo, janah sipake jadi palas kegeluhenta. Kata Dibata sipake jadi penuntun kegeluhen, janji Dibata si pake jadi penyemangat, kata Dibata jadi benteng pertahanan maka uga pe situasi e, labo situasi e si mengendalikan kita, tapi kita ngkuasai kerina situasi.

Ninta, ajarilah kami mbeligai wari-wari gelah kami pentar, isina eme kita mereken dirita kesempatan guna ndalani kegeluhen enda ibas penegu-negu Dibata. Adi ras IA, lit lalap dalam keluar, lit lalap kemenangan. Nggeluhlah ibas kataNa.